

213

pelajar luar bandar didedah suasana kampus

Kesempatan sehari bergelar Mahasiswa Universiti Malaysia Pahang (UMP) bagi 213 pelajar cemerlang tingkatan empat dari Sekolah Menengah sekitar Temerloh, Bera, Bentong dan Pekan pada 22 Julai 2010 yang lalu telah menyuntik semangat belajar bersungguh-sungguh bagi menyambung pengajian ke peringkat universiti.

Penganjuran Program Selangkah ke Universiti ini anjuran Badan Amal dan Kebajikan Tenaga Isteri-isteri (BAKTI), Kementerian Pengajian Tinggi dan 14 institusi pengajian tinggi yang dipilih, termasuk sebelum ini di Universiti Putra Malaysia (UPM), Universiti Sains Islam Malaysia (USIM) dan di UMP.

Naib Canselor UMP, Profesor Dato' Dr. Daing Nasir Ibrahim berkata, inisiatif penganjuran bersama ini jelas menunjukkan kesepakatan penterjemahan secara praktikal tanggungjawab sosial bagi menggalas tanggungjawab terhadap generasi muda.

"Iklim persaingan pada hari ini memerlukan kelasakan minda dan ketahanan fizikal yang tinggi di kalangan generasi muda. Mereka perlu memiliki daya saing, laluan dan destinasi yang jelas bagi persediaan menempuh alam selepas persekolahan," katanya.

Menurut beliau, penganjuran program ini perlu dijadikan program tahunan dan diteruskan penganjurannya terutama di kalangan pelajar sekolah dari seluruh negeri Pahang.

Program sehari ini turut didedahkan dengan forum motivasi 'Moh Masuk U' yang yang terdiri daripada Timbalan Naib Canselor (Akademik & Antarabangsa), Profesor Dr. Badhrulhisham Abdul Aziz, Timbalan Yang di-Pertua Majlis Perwakilan Mahasiswa (MPP) dan Presiden Sekretariat Majlis Mahasiswa Anak Pahang (SeMAMPAN), Mohd Fadzrul Hisyam Badarudin.

Katanya, penglibatan pihak Majlis Perwakilan Pelajar (MPP) dan warga kerja UMP ini juga akan menjayakan agenda kesukarelaan (*Volunteerism*).

Sementara itu, mewakili BAKTI, Datin Norlin Shamsul Bahri berkata, pelajar yang dipilih mengikuti program ini terdiri daripada latar belakang keluarga yang tidak mempunyai ahli keluarga yang belajar di universiti.

Beliau mengharapkan, penganjuran program sehari ini dapat memberi pendedahan pelajar dengan kehidupan kampus, pembelajaran yang menyeronokkan dan berazam untuk berjaya sampai ke menara gading.

Pelajar berpeluang melawat makmal, kolej kediaman dan sekitar kampus serta menjalankan aktiviti Latihan Dalam Kumpulan (LDK) bagi memupuk semangat berpasukan.

Seorang peserta dari SMK Tembangau Bera, Nurul Farhana Abdul Hamid berkata, pengalaman mengikuti kuliah dalam kelas, melawat perpustakaan dan belajar dengan ramai kawan sungguh menyeronokkan dan bertekad mendapatkan keputusan cemerlang dalam SPM tahun hadapan.

Majlis Perasmian Penutup disempurnakan oleh Timbalan Menteri Pengajian Tinggi, YB. Dato' Saifuddin Abdullah.

Dalam ucappannya, beliau menasihatkan pelajar memberi tumpuan kepada elemen 3K iaitu kursus, kelayakan dan kokurikulum sekiranya mahu terpilih ke institusi pengajian tinggi.

Hadir sama Timbalan Naib Canselor (Penyelidikan & Inovasi), Profesor Dato' Dr. Rosli Mohd. Yunus, Pendaftar, Tuan Haji Mustafa Ibrahim, Ketua Pustakawan, Tuan Haji Ruslan Che Pee dan pegawai Pejabat Pelajaran Daerah sekitar Pahang.

